

度
支
奏
議

度支奏議目錄

雲南司十二卷

覆湖廣按臣奏請推官劉熙姑改罰俸疏

覆王漕院請復推知原級疏

覆南京兵科條奏運事三款疏

會覆雲南鎮守子粒諸款疏

題請申飭糧道料理漕兌疏

覆四年節夫銀兩照例給發疏

覆王漕院題叙通漕完糧諸臣疏

覆王漕院甄叙漕政方面官員疏

題推官徐日曦漕竣復級疏

覆王漕院薦舉省直查驗漕糧推官疏

覆總漕巡漕查叅遲誤行糧有司疏

再覆崇禎四年漕運早完官員疏

題車戶運糧請增一厘腳價疏

度支奏議卷之十二

太子太保戶部尚書淄青畢自嚴視草

覆湖廣按臣奏 請推官劉熙姑改罰俸疏

題爲懇恩俯察造船有無遲玩仰祈

聖明勅部分別功罪以服人心事雲南清吏司案呈

七月初十日奉本部送戶科抄出湖廣巡按御

史白士麟題前事內稱漢陽府推官劉熙奉委

督造漕船如數完報并請查明沔陽衛指揮張

應斗原領錢糧緣繇本月初八日奉

聖旨據奏劉熙造船無誤王邦柱前叅豈屬無據着
該部核議具覆張應斗原領錢糧着行該省查明
交割本內監允衙門幾幾杖下是何緣故着一併
查來該部知道欽此欽遵抄出到部送司卷查先
該戶科抄出巡漕御史王邦柱題爲直糾怠玩
官員等事內叅湖廣武漢兩廠委官羅學伊劉
熙造船遲誤緣繇三月初三日奉

聖旨漕船需用甚急羅學伊等督造怠玩致誤兌期
着該部查議具奏欽此隨該本部覆擬武昌廂道

判羅學伊漢陽府推官劉熙奉委督造船隻何以十一月內興工正月末旬尚煩追比淹遲歲月幾誤廼公事合照議單於降職二級之外再降一級仍令戴罪督完撫按分別奏

請以規後效緣繇覆奉

欽依在案今據該省巡按會題前因除指揮張應斗原領錢糧併何故幾斃杖下呈堂咨行撫按查明具奏外其推官劉熙所造船隻既經全完相應酌覆案呈到部該臣等看得漕運轉輸惟藉

漕船蚤辦庶幾無誤厥事故議單所載凡督造遲違者降罰有差誠慮任事者之怠緩也若承委各官果能竭蹶從事無誤急需則功罪自不相掩今查漢陽府推官劉熙督造漕船原係續委代管之官而非初委督造之官也本官凜奉功令拮据于役集料鳩工所造漕船四十六隻俱於正月內陸續告竣於二月內給付武左等衛官旗領運啓行已經押赴江右若以造船三月爲限前船俱於限內通完不可謂怠若事矣但

近日水次兌糧俱限十二月開兌正月完兌而各船於二月內方赴水次當星速交兌之時而令人眼穿於望斷不謂之後至不可也先是漕臣王邦柱以爲違限而叅之臣部亦以爲違限而覆之蓋准之於開兌之例而非苛求於本官也今湖廣按臣白士麟備陳劉熙以續委代官原未出三月之限况船已通完而運亦無誤若仍降職三級則幾於短勞臣之氣而灰任事之心矣臣部原疏固謂督造完日撫按分別奏

奪令原船已完而按臣代

請劉熙原係帶管之官船完原有開復之例姑改罰俸半年免其降級抑亦可以示懲矣其通判羅學伊有無造完應否改罰開復仍候移咨查明再議者也除張應斗原領錢糧俟該省查明具奏外既經湖廣按臣會題前來相應覆

請恭候

命下臣部行文各該衙門一體欽遵施行

崇禎四年七月二十五日具

題本月二十八日奉

聖旨劉熙依議罰俸半年羅學伊該撫按疏內但稱
先押運在途不明開會否委造船隻殊屬含糊并
張應斗原領錢糧及幾斃杖下事情俱着嚴催查
明速奏欽此

覆王漕院請復推知原級疏

題爲新舊漕事已竣有司宜勞補過謹遵

明旨奏奪開復以寓激勸事雲南清吏司案呈八月
初八日奉本部送戶科抄出巡漕戴罪御史王
邦柱題前事內開松江府推官徐日曦常熟縣
知縣楊鼎熙新舊運事告竣請復原級緣繇本
月初六日奉

聖旨該部查議具覆欽此欽遵抄出到部送司卷查
先該本部題覆應天巡撫曹文衡題同前事七

月十四日奉

聖旨知道了還俟漕運完日聽巡漕御史復命奏奪
欽此當卽呈堂移咨都察院轉行巡漕御史俟
運完奏

奪去後今據御史王邦柱題

請前來相應具覆案呈到部該臣等看得彰輝勤惰
主上磨勵之大權然必功過相準信賞必罰而後羣
情益感奮於將來今查松江府推官徐日熾先
以無米折兌奉

旨降職五級常熟知縣楊鼎熙亦以完允愆期奉
旨降職二級此崇禎三年事也近經應天撫臣曹文
衡以二臣三四兩年新舊運事俱已報竣疏
請開復臣部查該府縣四年漕糧果徵貯於臘前
完允於春孟過江渡淮悉如程限且其治行素
表允爲有司之最覆擬開復奉有俟漕運完日
聽巡漕御史奏奪之

旨今漕臣王邦柱具題亦謂二臣經管糧艘盡抵通
壩實無愆違于役而旣竣矣則徐日曦楊鼎熙

言念今日之勤勞誠足補前日之罪戾臣等修
見

雷霆雨露

聖明原無偏用合無仰祈

聖慈俯從漕臣所

請准復二臣原降職級使諸臣知昔以遲漕加罰者
今以完漕示勸未必非鼓舞羣情之一大關鍵
也既經巡漕御史具題前來相應覆

請恭候

命下臣部行文各該衙門一體欽遵施行

崇禎四年八月二十人日具

題九月初三日奉

聖旨徐日騰新漕雖著勤勞但前降多級原因無米
折兌與遲誤不同何得援請頓復着再行確議具
奏楊鼎熙姑依議欽此

覆南京兵科條奏運事三款疏

題爲根本之綱繆宜豫漕儲之綜核宜嚴特陳末
議仰祈

聖裁以肅軍政以裕

國用事雲南清吏司案呈七月十五日奉本部送
戶科抄出南京兵科給事中郭建邦題前事等
因本月十二日奉

聖旨這條奏諸款于京管漕運有裨該部酌議具覆
欽此欽遵抄出到部送司查得兵科給事中郭

建邦條議六款除議軍兵之選補杜馬匹之侵
冒覈火藥之虛耗三款事隸兵部業經呈堂咨
行該部徑自酌覆外其清操運之混淆禁衛官
之朘削釐代運之弊濫三款允于漕務有裨相
應具覆案呈到部該臣等看得

國家今日所最急者無過兵食二者而已欲求兵
食之足則軍政漕運之弊不可不力爲搜剔也
臣部節經申飭不一而足但恐在外奉行或未
盡力今科臣郭建邦條議六事誠有見于漕督

漕政之敝壞而欲嘉與維新以爲根本命脉計也除軍兵馬匹火藥三項係兵部職掌臣部不敢越俎應聽該部酌覆外至于清操運禁賂削釐代運三款皆漕事也臣部責任攸關謹爲借籌酌覆逐款臚列上

請恭候

命下臣部行文該衙門欽遵施行

計開

一清操運之混淆夫軍有操與運之分謂其

操者自操躬擐甲冑以備緩急應援之用
運者自運領船赴次以應轉運漕艘之需
兩者原不容混淆也合無于僉派運糧之
際務令本衛所指揮千百戶官從公認派
殷實有力之軍因船坐名因糧定數造冊
呈報漕道漕院此外係差操者不許捏名
混報仍令五名互相保結庶無甲代乙役
賣富差貧之弊而爲練習爲轉輸各效其
職所謂操運之不容混淆者此也伏乞

聖裁

一禁衛官之殷削夫衛官輪番運糧自其職掌乃南京三十四衛應兌江西漕糧此中精明廉幹者自能督運無私而就中指領運爲奇貨視旗綱爲魚肉或那甲以移乙或鬻富而差貧甚且通同書識漁獵旗甲而旗甲割肉醫瘡那東補西以致沿途偷盜抵壩起欠徇一己之谿壑虧萬軍之命脉所繇來矣恐又不獨一南京諸衛爲然

也今後凡運官之領幫旗甲之僉派及開
兌之啓行一切薪水使用坐船公費敢有
侵染分文顆粒者許旗軍詰告得實依律
重處庶法嚴而人知畏而旗軍稍得寬其
騷擾亦可併力于輸將之用矣所謂禁衛
官之朘削者此也伏乞

聖裁

一釐代運之弊習夫舊例衛官掌印之後卽
赴運糧其所以均勞逸而適甘苦法至善

也無奈法久人玩強而有力者多方規避
甚且戀印不捨暗中那移以自己應得之
差而卸擔于別官未免強坐貧弁而貧弁
以餓虎當飽食卽以此爲潤肥之策開兌
有費坐船有費百端需索題目難應未登
舟而旗軍之膏脂已竭及抵壘而

朝廷之公帑已虧代運之弊歷歷皆然伏乞

勅令兵部選司凡漕上取用運官必須徹底清查凡
掌印過者卽令挨年輪流轉運不得指稱

印務巧爲規避使奸詭者不得營規于運
之外貪饕者不得蠹宿于漕之內而後剝
軍虧漕之害或可免矣所謂釐代運之弊
者此也伏乞

聖裁

崇禎四年九月初七日具

題本月十一日奉

聖旨操運混淆及衛官朘削代運等弊依議嚴行申
飭但婪弁侵漁者固有姦旗偷盜累官者亦會不

乏若許旗軍告訐豈成法紀還着巡漕御史及漕
道嚴行查核糾叅處治欽此

會覆雲南鎮守子粒諸款疏

題爲遵

旨酌議具奏事雲南清吏司案呈案查本年六月初
二日奉本部送戶科抄出本部題前事等因本
年五月二十八日奉

聖旨子粒改歸有司定多侵欠還着該鎮自徵但不
許溢額厲民縱役生擾至兵權等款亦惟去其太
甚何得繁徇偏說一切苛禁非但不成鎮體亦豈
朝廷優任勛舊之意且各款應否俱屬戶部具覆

着該司官奏來仍一面會同該部通行酌妥合疏
具奏欽此欽遵除本司自行回

奏外所有疏內各款除子粒係本部酌議外其餘
各款事關禮兵刑三部酌議已經通行咨會去
後今於六七八等月十二等日奉本部送准各
部咨復前來相應依議列款具覆案呈到部該
臣等會同禮部左侍郎李孫宸等兵部尚書熊
明遇等刑部尚書胡應台等看得

朝廷之眷顧勲舊

恩禮原是優渥而勲臣之坐鎮遐荒體統亦屬崇隆
前因故鎮臣沐啓元猖狂不簡墮厥家聲按臣
余城有慨于中故乘新鎮臣沐天波襲爵之初
條陳善後六款已經後按臣甘學閏酌議臣部
叅訂具覆大約爲鎮臣銷驕矜之習永帶礪之
圖不意擬議未嘗復煩

聖問蓋以鎮臣遠居南服首資彈壓倘或過加裁抑
恐不足以制馭苗蠻欲令臣等處置得宜以重
股肱之寄真

睿慮周詳明並日月者矣除詞訟不宜聽理一款奉

有

俞旨外其餘各款相應開列前件恭酌覆

請恭候

命下臣部行文督撫衙門并咨都察院轉行巡按御史及行該鎮一體欽遵施行

計開

一曰總莊子粒宜歸有司徵收

前件該戶部看得汰鎮莊田先于萬曆三

十九年該撫臣周嘉謨按臣鄧漢疏

請責成州縣有司徵解因前事之已行者也是以臣
部前疏議照萬曆年間事例仍歸州縣
催徵其有租額原溢于三分之外者許
該州縣如舊徵解謬謂該鎮歲入無損
而亦可預防其騷擾于未然也今奉

明旨聽該鎮之自行徵收令無虧于額內以杜奸佃
侵漁之端仍禁該鎮之縱役生擾令無
溢于額外以造遐方和平之福優舊與

仁民真兩得之

睿慮周詳誠非臣愚膚見所及相應遵照

新旨申飭奉行該鎮當仰體

德意杜絕投獻遵依原額無多派以病民約束莊役

無倚勢以滋擾則地方安而該鎮亦安

計新鎮臣嗣服伊始淳朴未彫當自能

仰副

聖慈者矣不者恐遐方見以爲厲民而撫按不能相

忘於無言也伏候

聖裁

一日鎮守兵權宜屬督撫節制

前件該兵部看得

開國之西平留鎮滇南一切兵權盡歸職掌後添設
巡撫奉有贊理軍務之

勅凡有征調必撫鎮關會而後行蓋匪獨謀斷相資
亦所以杜漸防微也然該鎮雖擁有兵
柄歷世從無跋扈惟舊鎮驕恣多事至
厯按臣尾大不掉之憂新鎮幼冲旣恪

遵

明旨照沐朝輔例重大事情暫聽撫按處分則節制二字亦不必過爲不必然之防矣伏候

聖裁

一曰爵賞

大典不宜出自鎮臣

前件該兵部看得該鎮設有中軍旗鼓原係本部推選至衛所官員委用皆撫按各道都司爲政該鎮雖元勲後裔猶然

聽爵賞于

中朝而何敢作福乎按臣所指或就舊鎮一時劄委人員而甚言之耳今猴冠輩旣經革斥以後申明

功令不許假借名色濫用匪人亦正體統而尊朝廷之道也伏候

聖裁

一曰用刑有法鎮臣不宜殘逞

前件該刑部看得刑以詰奸禁暴不得已

而用之者也鎮臣奉

命鎮守滇雲所屬衛所莊民漢夷襍處自不能盡捐
刑法以弛其控馭之權然鎮臣之體至
隆重矣以袞舄之尊理囂爭之事於體
甚褻勢不得不假之左右委之軍職其
間豈能無借勢作威淫刑逞臆以傷

朝廷愛養之意者此不可不慮也切謂

朝廷設臣分職專理在直鎮臣所拊循獨非

朝廷赤子乎除該府約束規條自理外其他一切地

方軍民詞訟宜聽之撫按有司察情據
律議擬平允各以公移照會庶冤濫之
浮議可杜而鎮臣之體貌益崇計無便
于此者嘗聞黔南自開鎮以來恩威並
著地方之人亦無不尊如神明愛如父
母近始有苛使虐用之議致開同事水
火之嫌所損實多新鎮臣冲齡嗣爵必
能仰體

國家付託之重追念先世撫綏之仁蠲煩去苛一

意休養與撫按諸臣和衷共濟斯造福
宏遠矣伏候

聖裁

一曰爲國以禮鎮臣亟宜講明

前件該禮部看得

國家之所以培養勲胄與世臣之所以善承庥德
者莫尚于敦禮而勸學已昔我

宣

宗章皇帝謂吏部尚書蹇義曰勲戚家有教官此

祖

宗所定大抵勲戚子弟生長富貴不知艱難惟肆驕

奢蔑棄禮法故特選儒者教之

聖訓于昭世世承之故在京有武學之教有國學之
教意甚周思至渥也滇鎮遠在天末孤
陋寡聞驕矜誇大匪其性殊亦漸靡使
然耳按臣議飭該鎮欲繩之以就近習
禮之條嚴之以左右近習之罰其有不
率至生事擾人者撫按具聞以憑

朝廷裁處皆非無見也然該鎮累葉家乘得失善敗
之林具在姑不臚列抑勉思其善可乎

昔沐昭靖英之始鎮滇雲也簡官僚剔
姦蠹撫農興學恩威並著顧尤愛讀通
鑑綱目大學術義至手不釋卷其勤如
此故能貽厥令緒與

國同庥以逮今茲詩云王之蓋臣無念爾祖試援
我

訓所以篤厚功臣苗裔者以振廸于前又卽鎮臣先
世之德可紹明者以悚動于後一經

天語告誡自當奉爲玉板金章奕葉無替又臨直膠

祖

庠端趨雅拜之文而已伏候

聖裁

崇禎四年九月初八日具

題本月十四日奉

聖旨這酌議諸款徵收子粒已有前旨地方詞訟應
歸有司至兵機軍務自當與撫臣協計酌行將領
除原係部選外其餘劄委一切禁絕豈成鎮體但
不得濫用匪人該鎮世守滇南任寄良重還著盡
忠謹度勿替前休以副朝廷優禮勲臣之意其撫

按及地方官有偏激構釁的一體併議欽此

題請申飭糧道料理漕兌疏

題爲新運在邇監兌已裁請

旨申飭糧道加意料理漕兌事雲南清吏司案呈崇
禎四年八月十六日奉本部送據湖廣監兌本
部貴州司主事陸卿正呈稱職欽奉

勅諭監兌湖廣崇禎三年漕糧兼督通省金花

內供顏料茶蠟布絹并稅糧馬草新舊正雜餉銀
畏茲

簡書夙夜匪懈其漕事遵例報竣獲免罪戾漕艘過

淮職隨星速抵楚督催一應京邊錢糧布絹餉銀日夕頻呼不避勞怨奈楚地幅員遼濶文移往返動經數月又兼連年水旱習成積玩疾呼未能卽應職遵

勅命屢行各屬近始惕于

功令之森嚴京邊錢糧亦已次第完解其間庸頑怠玩者叅罰不敢少寬似可計期而報

命矣第查往歲監兌運務雖竣而印務關係甚重必候新差交代職前閱邸報吏部一本爲急

錄

要監司等事奉

聖旨這增設糧道專官既經酌定卽着王象晉以原
官改任押運抵灣其蔣英調補員缺速推及兩道
分轄與裁併鹽廳事宜俱依議據稱監兌可裁當
以五年爲始且各省事歸一體還着吏戶二部通
行確酌具奏欽此職卽晝夜竭蹶恪共職事靜俟
明旨若果裁有定議不復題差已無代事之人職自
無可候矣然

勅印攸關

奏繳無期何敢貿貿不爲呈請伏乞蚤賜明示庶
否候代其督催京邊冊揭叅疏并欽奉

勅印應于何時

奏繳庶職有所凜奉不致皇皇無適矣再照今歲
漕糧實藉憲令業已挽遲爲速今值夏杪秋初
尤當亟爲催徵尚賴嚴檄漕運各官星夜催償
則四年兌運自可無誤期限等因到部奉批明
年監兌業已奉

旨裁革自與舊差司官無干俟卽題

請申飭糧道料理惟是近題督催新舊二餉起解赴京責任尤重不可不亟留意也奉此案查崇禎四年正月內本部准吏部咨爲急缺緊要監司等事內稱該本部題前事正月十二日奉

聖旨這增設糧道專官旣經酌定卽着王象晉以原官改任押運抵灣其蔣英調補員缺速推及兩道分轄與裁併鹽廳事宜俱依議據稱監兌可裁當以五年爲始且各省事屬一體還着吏戶二部通行確酌具奏欽此已經咨會酌確該部具疏覆

請令將各省監兌以崇禎五年爲始盡行裁革其一
應查核事宜責成督運糧道等因二月十二日奉
聖旨是今後因事議請設官該部還確酌長便方與
覆行不得繁徇以致倏增倏革有妨政體欽此欽
遵抄出到部咨會前來業經通行欽遵在卷今
據前因合應題

請申飭責成糧道督催新漕以全

國課案呈到部該臣等看得省直漕米關切

國儲事何如其重也比歲旱

勅監兌司官督催完解今該吏部覆應天撫臣之請
議裁監兌自五年爲始歸併糧道奉有

欽依則監兌之議裁無容再計矣此後監兌之事卽
糧道之事監兌之職掌皆糧道之職掌凡崇禎
五年新運如先期之催船催糧臨時之開兌開
幫異日之過淮過洪皆當早爲料理者也諒各
道臣自有同心或不煩臣等督責但臣部職司
國儲旣以匱乏爲憂又以遲緩爲懼誠不得不鯁
鯁過慮乞靈

皇上早爲申飭也者合無

勅令各該糧儲道臣將前項監兌事務悉心料理務期星速兌運不致愆期至于舊例金花

內供及新舊二餉一體兼催從來俱係糧道之責於今並肩監兌之任仍於歲終事竣之日將兌完糧米與起解錢糧各數目日期造冊呈送撫按具題甄別以完欠之多寡定各道之殿最倘有情竄不振者臣部自有考成之功令在也廼若監兌各官近又題奉

明旨督催新舊二餉務求如期滿額應俟差滿回任
臣部照例考核庶人心競惕而

國課無逋矣既經該司案呈前來相應題

請恭候

命下臣部行文各該衙門一體欽遵施行

崇禎四年九月十三日具

題本月十五日奉

聖旨監兌既裁一切新運事宜着各該糧道上緊料理如有遲誤定行重處其併催金花等項錢糧及

考成事宜俱依議各監允督催新舊二餉務如期
足額違者回部嚴行考覈奏奪欽此

覆四年簞夫銀兩照例給發疏

題爲懇乞例給簞夫稍甦軍苦事雲南清吏司案
呈九月十五日奉本部送戶科抄出巡漕御史
王邦柱題前事內稱據涇儲道右布政使錢士
晉呈蒙臣批據准大等總運糧把總劉延唐等
呈據淮安等衛運官張爾翼等請給一分簞夫
銀兩扣存抵補欠數緣繇看得一分銀兩原以
備沿途添簞添夫之費者也去歲河無淺溜漕
舟利涉則此銀可省于是酌議扣存免給以佐

軍需之一滴故題奉

明旨以後非遇淺剝不得輕用但今歲自春徂夏天
氣亢旱河流膠淺屢經起剝蓋盤剝一番未免
多一番折耗而雇船水脚與加夫挽拽其所費
更不貲矣各幫官旗不惜勞費以期速運迄今
起糧事竣紛紛告領前銀徵臣目擊軍興費繁
何敢擅爲請給以損公帑而各幫以起剝耗用
致有逋欠與徵舊例原設之銀卽扣存以抵補
欠數則此銀仍非官旗所得有也應否准從是

在

聖恩浩蕩非微臣所敢輕議也伏候

勅部查酌具覆遵行本月初八日奉

聖旨戶部酌議具覆欽此欽遵抄出到部送司卷查

崇禎三年九月二十九日奉本部送戶科抄出

前任巡漕御史龔一程題爲

聖德格

天
重運飛輓請乞節省釐夫一分官銀以充軍餉以濟
國用事內稱今歲重運仰仗

皇上至德潛孚

天心九千漕艘渡江過湖繇淮涉黃延袤數千里而
遙咸得速達津通以告成事免於阻凍所省實
多舊例每糧一石給簞夫官銀一分今歲際此
順境又多雇募民船前銀似應免給據該道精
核計可省銀三萬兩爲

朝廷樽節以佐軍需之用以後年分旣無雇船之例
如遇淺溜前銀仍應照例給發伏乞

勅下戶部覆查前項簞夫官銀除置做口袋外其餘

銀兩留貯助餉後不爲例等因九月二十八日奉

聖旨這簞夫官銀旣屬可省着卽扣留充餉以後非遇淺剝亦不得輕用該部知道欽此業經呈堂通行遵照在案今巡漕御史以今年天氣亢旱各幫船糧屢經起剝題

請照例給發簞夫銀兩以蘇軍困奉

旨下部相應酌覆案呈到部該臣等看得錢糧出入期於當可濫費則病

國慳吝則損下總非經久之良謨也查舊例每漕糧一石給簞夫官銀一分原餉漕船淺溜爲添簞雇夫起剥之費載在議單昭然可考客歲巡漕御史龔一程以漕糧多係有司雇募民艘一切簞夫等費俱取給雇值之中與軍旗無與題請免給以充軍餉蓋目擊各軍原無此項之費不欲循舊例而滋濫觴耳查原疏中亦謂以後年分既無雇船之例如遇淺溜前銀仍應照例給發是又不欲借節省之名損下而益上也及奉

明旨以後非遇淺剝亦不得輕用大哉

王言其於節省之中未始無卹軍之深意矣今巡撫御史王邦柱以今歲自春徂夏亢旱已極逐處淺阻屢經起剝添夫諸費皆各軍措處非若去歲取給雇值者也且多剝則多耗多耗則多欠軍旗之苦又不止盤剝之費已也漕臣身親糧艘日與官旗相習稔知沿途艱苦爲各軍請命原非市德而沽恩第欲平情而濟運况議以應給之官銀扣抵掛欠則前銀亦非官旗所得有

也舊銀當給似無可疑臣部雖欲爲

國家惜財節用而議單所載輿情所嚮亦終不容
慳吝合無仰祈

聖慈俯從漕臣所請將前銀照例准給扣抵欠數不
惟官旗沐

浩蕩之宏恩卽倉庾亦鮮不了之積逋矣旣經巡漕
御史具題前來相應覆

諸恭候

命下臣部行文各該衙門一體欽遵施行

崇禎四年九月二十三日具

題本月二十六日奉

聖旨這簞夫銀准照例給發還查明掛欠卽行扣抵
不許官旗營領仍致通延欽此

覆王漕院題叙通漕完糧諸臣疏

題爲僨運糧儲事雲南清吏司案呈八月二十四
日奉本部送戶科抄出巡漕御史王邦柱題前
事內稱臣惟轉漕一役事關七省道里綿邈呼
吸遽難猝應非熟撫按驅催何能速襄厥事今
歲各省直允發船糧俱于正月月中旬盡數開幫
于三月初九日過淮二十二日過洪六月十二
日銜尾轉津嚴催頂接通壩所省剝運之費更
又不貲皆賴

皇上洪福致有今日之速此數十年所未有而僅見者也是役也總督漕撫右侍郎李待問總理河道尚書朱光祚應天巡撫今陞蒞遼總督右侍郎曹文衡江西巡撫魏煦乘浙江巡撫陸完學湖廣巡撫魏光緒山東巡撫余大成直隸巡按御史史堃巡鹽兼監兌御史鄧啓隆蘇松巡按御史饒京江西巡按御史葉成章浙江巡按御史李柄山東巡按御史高捷河南巡按御史李日宣以上諸臣忠勤體

國公爾忘私間船問米惟孜孜汲汲不避勞怨催
允催行直懇懇勤勤罔辭指据或小艇周流於
水次或減從躬督於河干或疏派尋源以期速
濟或設兵陳衛以護輓輸或程途最遠而首幫
過淮獨先或糧米最多而通幫開行依限或臨
倉允糧無間於節年或悉力督運不憚乎瘁瘁
用能使艣艦星馳銜尾遙發又如河南監允主
事諸葛義浙江監允主事路文範蘇松監允主
事傅啓光山東監允主事焦覲祖江西監允主

事吳澧湖廣監兌主事陸卿正以上諸臣殫力
急公實心任事稽察旗甲禁戢奸弊偏臨郡邑
水次涉歷艱辛皆於漕事著有勞績其通漕糧
船徵臣依限贖來轉津抵務時值河流洋溢俱
得頂接通壩而總督尚書錢春苦心籌畫上下
親催運納裁委釐蠹倉政肅然督治通鎮侍郎
范景文計切儲糈撙飭官兵早夜慎加防護坐
糧廳郎中劉夢桂躬督起納備極勤勞指日可
盡數捆載以登

天府矣而通惠河郎中馮敬舒務關主事許捷協理
主事程世培皆其往來河干竭蹶効力者也以
今輪輓既速臣不敢貪工掠美而盡攘爲已用
是直陳至於總漕督臣李待問嚴督統屬之允
已見爲手口多艱復催各省之漕又不翅方圓
並畫歷更三運前之業與漕臣龔一程並著勤
勞至今歲之役復數十年久違之限其間人情
積玩振飭爲難水程旣遙鞭驅匪易所與徼臣
茹辛殫瘁協恭併管以迄有成者則總漕督臣

實心幹

國籌切轉輸之效臣不敢蔽其功能也我

皇上念漕運之艱屢勤

宵旰而總漕督臣加秩酬功之典

聖明自有睿炤等因本月二十日奉

聖旨該部知道欽此欽遵抄出到部送司相應分別

酌覆案呈到部該臣等看得轉漕一事關係軍

儲仰賴

聖明幾頒

功令一時羣工惕勵夙夜拮据猶惴惴焉思水旱
之不時輸輓之不易無以奏成功而象

上指所幸今歲省直漕糧開兌開幫多在於歲前過
淮過洪不越乎春月抵津抵通僅屆夫秋初此
皆我

皇上獨斷之功振刷之力也因憶漕糧阻凍已數十
年於茲說者多慮極重難返或欲通折一年而
後可望更張今曾無損漕虧額之舉而全收挽
遲爲速之効客歲纔露其端倪今歲頓復乎

祖

制亦大稱盛事矣伏念在漕諸臣効力宜勞固臣子
鞠躬之大分而功懋懋賞實

朝廷激勵之大權臣等謹按漕臣王邦柱原疏逐員
開列恭聽

睿裁如總督漕運戶部右侍郎李待問念切公忠計
周軍

國督撫屬之允拮据多艱而官旗祇若真是弊絕
風清催省直之漕方員並盡而

欽限弗違何異星馳電掣一腔凜持精白三運歲著

勤勞總督倉場尚書錢春苦心規畫滿腹經綸
催儻不避暑寒奔走馳驅輪輓遂速于流水籌
策弗遺顆粒釐弊剔弊官旗盡惕于飲冰督運
于今二年銷算且閱三載以上二臣當漕政積
弛之日奏軍儲永賴之助洵稱勞苦而功高首
宜加恩而晉秩如總理河道工部尚書朱光祚
鴻敷經緯控制江淮全漕九千餘之艘艘岬尾
遙發終歲四百萬之儲侍安瀾不驚飛輓卓矣
告成玄圭巍然奏績宜從優異用示寵榮督治

通鎮兵部侍郎范景文督甲冑以飭防儲糧演
池無竊發之虞守重地而加意河漕糧艘獲轉
輸之便恩流邊戍功在封疆宜有恩賚以酬偉
伐如應天巡撫右副都御史今陞總督薊遼兵
部右侍郎曹文衡江西巡撫右僉都御史魏照
乘浙江巡撫右副都御史陸完學湖廣巡撫右
副都御史魏光緒山東巡撫右副都御史余大
成念切軍儲慮周民隱問船問米狐鼠之積弊
盡釐催兌催行舳艫之買勇甚捷雖任有淺深

而彈壓並著如直隸江北巡按御史史堃廬
兼監兌御史鄧啓隆蘇松巡按御史饒京江西
巡按御史葉成章浙江巡按御史李柄山東巡
按御史高捷河南巡按御史李日宣嚴剔風弊
力振新猷啓行最先能使千艚趨潞水轉運不
滯坐見萬艘實京庾雖地分南北而助勦同功
又如河南監兌主事諸葛羲浙江監兌主事路
文範蘇松監兌主事傅啓光山東監兌主事焦
覲祖江西監兌主事吳澧湖廣監兌主事陸卿

正禁戢宿蠹涉歷艱辛開允則子粒必親啓行
則片帆弗滯力洗苦窳之弊謹防虧折之端又
如坐糧廳署郎中事主事劉夢桂務關主事許
捷催僨主事程世培通惠河郎中馮敬舒百端
竭蹶一意奉公米色務求其精督催無間乎風
雨畚鍤不辭其瑣往來常在乎河干以上諸臣
俱于漕事著有成績均應紀錄優叙以旌勞勩
者也至巡漕御史王邦柱振飭精明督率整肅
啓行在舊歲十月完漕在今年八月奔馳下風

食水宿之中十三總官旗懷息經理于千倉舊
箱之際四百萬軍將爭先經綸滿腔撐持獨苦
俾數十年久違之限一朝頓復盡催運艘頂接
通壩所省臣部剝運之費又復不貲此其實心
幹

國與總漕督倉協恭并管以共襄厥成所當照舊
漕臣龔一程例候京堂員缺推用者也蓋漕輓
報竣亦歲事之恒而

祖制頓復實殊常之績其運務之愆期者

功令繩之既不得不峻則運務之更新者爵賞酬之自不容不隆此真

國法人情之所宜然者非臣部敢爲市恩而樹德也既經巡漕御史具題前來相應覆

請伏祈

勅下吏部酌議分別加銜紀錄行文各該衙門一體
欽遵施行

崇禎四年九月二十六日具

題十月初二日奉

聖旨漕運蚤竣該部正當確稽各官勤勩實蹟覈議
奏聞以憑激勸何得混行鋪列獎譽過實這本內
各官有任久勞深及地方錢糧重大催解獨多的
着查酌議叙餘不必繁及還着另本分別來看欽
此

覆王漕院甄叙漕政方面官員疏

題爲甄叙方面官員以裨漕政事雲南清吏司案
呈九月初一日奉本部送戶科抄出巡漕御史
王邦柱題前事內稱臣奉

命謬肩漕挽適際挽復卑限之初而羣情久弛提掇
實難雖報

國有心日夕呼振而地方遼遠問船數米督先催
行殆非一手一足之力所藉以分猷彈壓者繫
惟藩臬諸大吏是賴茲值漕白糧船盡抵通壩

以告一歲之成則督糧管河諸道臣同心匡濟之功未可泯也除江西糧道黃應秀因造船奉旨降級應俟元日奏

奪又如管通州道事太僕寺少卿張春等或歷俸尚淺或署事方新俱不敢繫叙外查得漕儲道右布政使錢士晉山東左布政使陳應元湖廣左布政使杜詩江西左布政使何應瑞徽安兵備道左布政使王公弼蘇松常鎮糧儲道王象晉河南督糧道右叅政游王庭濟寧兵河道孫紹

統分巡兗東道右叅政朱大典分巡東兗道右
叅政蔣如奇河南管河道右叅政應朝玉帶管
浙江督糧道事屯鹽水利道副使袁一鳳湖廣
督糧道副使劉永祚寧太兵備道副使盧洪珪
帶管山東督糧道事武德道僉事今陞本省提
學副使湯道衡淮海道副使周汝璣昌平道前
帶管霸州道事副使寇慎潁州兵備道副使吳
道昌揚州海防道僉事柴紹勲管理遼餉道僉
事張志芳以上諸臣職守雖殊而於河漕均有

裨益所當一併甄叙以聽分別紀錄者也至于
漕儲道錢士晉鞭漕督白雖風濤暑雨頃刻靡
寧蓋昔以撓逆之勁骨催抑已閱六年今以急
運之熱腸馳驅更經百瘁卑限旣復厥有成勞
而嘉與優擢以示勸勵請自
聖裁又非微臣所敢輕擬也伏乞

勅部再加查覈如果臣言不謬將錢士晉酌議優擢
及陳應元等分別叙錄開復則諸臣兢勸而河
漕有裨矣八月二十七日奉

聖旨漕運早竣錢士晉督催勤勞并各省司道俱着
分別叙錄該部知道欽此欽遵抄出到部送司相
應分別叙錄案呈到部該臣等看得今歲漕運
賴我

皇上功令嚴明總漕李待問巡漕王邦柱祗畏

簡書悉力催餉得以早竣就中司道諸臣戮力拮据

頓令四百餘萬漕糈于六月內俱報抵津于八

月內過壩竣事今年回空旣蚤明歲新運必速

祛數十年之積習定

聖天子之新規諸臣勞勩誠有不容不爲昭揭以示
激勸者今查漕臣王邦柱疏薦各官除江西糧
道黃應秀造船遲緩奉

旨降級俟漕船完日奏

奪管通州道事太僕寺少卿張春山東糧道莫儼臬
淮徐道劉泓武德道朱瑛霸州道張耀采蘇松
道蔣英常鎮道吳麟瑞密雲道孫士髦或歷俸
尚淺或署事方新及已經陞調遷去者俱不敢
槩叙外查得漕儲道右布政錢士晉貞操克儉

不渝長才紛糾咸當調停於軍民之際嘗洞中
乎機宜奔馳于江淮之間能恪遵夫程限宿弊
於焉盡掃全漕賴以飛馳當照題覆前任周鼎
成例聽候巡撫京卿員缺推用者也山東左布
政使陳應元湖廣左布政使杜詩江西左布政
使何應瑞徽安兵備左布政使王公弼蘇松常
鎮糧儲道右叅政王象晉河南糧道右叅政游
王庭濟寧道右叅政孫紹統分巡兗東道右叅
政朱大典分守東兗道右叅政蔣如奇河南管

河道右叅政應朝玉浙江糧道副使表一鳳湖
廣糧道副使劉永祚寧太道副使盧洪珪山東
武德道今陞本省提學副使湯道衡淮海道副
使周汝璣昌平道帶管霸州道事副使寇慎頹
州道副使吳道昌揚州道僉事柴紹勲遼餉道
僉事張志芳以上諸臣砥操嚴於素絲飭備夙
于陰丙徵允如法倉庾杜濫惡之端催趲及期
水運絕逗遛之弊總之民懷而吏畏遂令旗悅
而軍怡以上諸臣均於漕政有裨相應移咨吏

部紀錄以備擢用內湖廣糧道劉永祚以三年糧運報完稍遲奉

旨降級業經漕臣以新舊運事俱竣題

請開復臣部見在覆議所當一體紀錄者也伏乞

聖明鑒察一併查照分別優叙斯亦

王者鼓勵羣工之大權矣既經巡漕御史具題前來

相應覆

請恭候

命下臣部行文各該衙門一體欽遵施行

崇禎四年九月二十六日具

題十月初一日奉

聖旨這漕運効勞司道各官陳應元等併劉永祚俱
與紀錄錢士晉俟新運完日一併酌議優擢該部
知道欽此

題推官徐日曦漕竣復級疏

題爲新舊漕事已竣有司宜勞補過謹遵

明旨奏奪開復以寓激勸事雲南清吏司案呈九月初五日奉本部送戶科抄出該本部題前事內稱松江府推官徐日曦常熟縣知縣楊鼎熙新舊運事俱竣請復原降職級緣繇本月初三日奉

聖旨徐日曦新漕雖著勤勞但前降多級原因無米折兌與遲誤不同何得援請頓復着再行確議具

奏楊鼎熙姑依議欽此欽遵抄出到部送司除將
楊鼎熙移咨吏部併應天撫按遵照外其推官
徐日曦奉

旨確議相應酌覆案呈到部該臣等看得漕運積弛
有日幸賴

皇上加意振刷始復

制之舊臣等仰體

聖懷多方振刷故凡于漕事稍悞者必力爲糾論不
敢一毫寬假頃該漕臣王邦柱疏題松江府推

官徐日曦常熟縣知縣楊鼎熙新舊運事已竣
請復原降職級臣等欽奉查議之

旨以今歲蘇松運事比往歲更蚤兩月二臣與有力
焉故議令開復臣愚以爲蓋愆補過可徹寬政
茲奉

明旨楊鼎熙依議徐日曦新漕雖著勤勞但前降多
級因無米折兌與遲誤不同何得援請頓復着
行確議益仰我

皇上如天之仁雨露霜霰纖毫不爽臣等又憬然於

惟輕之爲謬矣今該臣等確爲酌議簡查當日
撫臣曹文衡原疏則推官徐日曦原申運官李
師靖遷延受允本有挾仇報復之情後因上海
無米遂借庫銀買米運官勒銀以爲質非交銀
而折米也逮後日曦星夜赴蘇稟請撫臣差官
追銀買米不許片帆私開方克集事此則當日
允米之實情也與真正無米折允者異矣且其
治行表表明允稱最松江士民無不極口稱屈
總漕巡漕無不文章薦揚前經該撫題留照舊

管事今則三四兩年運務俱竣臣部所爲題覆
原級者誠有見於此耳今奉

聖旨前降多級何得援請頓復臣等再加酌議合無
姑令先復三級其餘二級俟五年新運蚤完聽
撫按奏

請開復庶

皇上之鼓舞激勸並行不悖而臣下有不倍爲感奮
者非夫矣既經該司案呈前來相應覆

請恭候

命下臣部行文各該衙門一體欽遵施行

崇禎四年十月十三日具

題本月十八日奉

聖旨徐日曦以無米折兌前疏奉旨已明何又代爲
寬解既說兩運蚤竣姑准復二級俟新運完日另
議欽此

覆王漕院薦舉省直查驗漕糧推官疏

題爲薦舉省直查盤漕糧推官以裨

國計事雲南清吏司案呈九月初九日奉本部送
戶科抄出巡漕御史王邦柱題前事內稱案查
奉都察院勘劄爲漕政日遲日壞救敝宜變宜
通敬陳目前急務以挽全漕以裨

國計事准戶部咨總督漕撫戶部左侍郎蘇茂相
題前事該本部覆看得徵兌漕糧各有

欽限單例降罰毫不容假邇年回空旣遲州縣徵收

亦因之俱遲如長興縣至六月間尚無糧米此其怠玩爲何如也今議查催專責之推官借其風力彈壓長吏于每歲十二月間躬行所屬逐倉查驗糧米完足曬揚乾潔始交付通判充軍至過淮之日一體登薦而徵免愆期者推官揭報漕撫漕院以白簡從事臣部隨酌其遲違之遠近分別降罰如此則懲創旣嚴而徵免自可如期矣等因覆奉

聖旨這條議漕政五款旣議妥着行各該衙門遵奉

施行欽此欽遵移咨解劄前來遵行在案查得崇禎四年起運崇禎三年漕運臣自拜

命之後隨經督行省直各府推官親查所屬州縣倉廩將崇禎三年分應徵本色正耗漕糧照額盤驗足數如式曬揚乾潔交兌官旗領運該臣督同漕儲等道尾押抵通所據諸臣查盤之勞克勤漕務得之真見真聞相應循例薦揚以示激勸等因崇禎四年八月二十七日奉

聖旨該部知道欽此欽遵抄出到部送司查得省直

歲徵漕糧逐倉查驗乾潔如期交兌專責推官
業經本部題奉

欽依通行在案今據巡漕御史王邦柱以各官督催
糧米拮据多勞循例薦舉相應酌覆案呈到部
該臣等看得催督漕糧向來寄重任於府佐不
意玩愒成風以致遲延誤運先該臣部條議專
責成於推官蓋借其風力彈壓長吏每歲終躬
行所屬逐倉查驗而徵兌愆期推官得以揭報
參處今歲漕糧幸賴漕臣王邦柱督令各推官

嚴加查驗如法曬揚乾潔交兌運軍過淮已蚤
竣事各官綜理之勞誠不可泯沒者也今漕臣
疏薦各推官除常州府推官劉興秀杭州府推
官郭必昌嘉興府推官楊希旦武昌府推官禹
好善荊州府推官朱邦祈俱經行取松江府推
官徐日曦舊年糧運稍遲奉

旨降級今該撫按具題臣部覆

請准復二級俟新運完日另議不必槩叙外鎮江府
推官周廷鑑揚州府推官宋企郊淮安府推官

王用予應天府推官吳起龍湖州府推官胡守
恒兗州府推官鄭光昌撫州府推官薛振猷鳳
陽府推官張盛美歸德府推官萬元吉德安府
推官江孔燧濟南府推官劉承棠饒州府推官
朱天麟廬州府推官王嘉言南康府推官錢啓
忠建昌府推官陳起龍黃州府推官歐起鳴南
昌府推官李嗣京太平府推官梁應龍吉安府
推官洪啓遵東昌府推官姚士鴻衡州府推官
蔣有成以上二十一員雖科名有甲乙之分而

勤劬無彼此之異率皆實心任事銳意急公文
學共吏治兼長

國計與民生攸賴允爲司李之良可儆清華之選
相應一體甄叙以示激勸既經巡漕御史具題
前來相應覆

請恭候

命下臣部行文各該衙門一體欽遵施行

崇禎四年十月二十六日具

題十一月初四日奉

聖旨是欽此

覆總漕巡漕查叅違誤行糧有司疏

題爲特糾違玩有司以飭漕政事雲南清吏司案
呈九月二十三日奉本部送戶科抄出總漕部
院李待問題前事內稱會同巡漕御史王邦柱
看得漕法森嚴運限急迫旗軍月糧所係尤重
該臣等屢疏題明預期徵給又檄行如正項一
時不敷不拘別項先行借發候徵補還申飭真
不啻再三而邵嘉祿等蔑視代庖之官罔念漕
輓之急乃蹬寒并肆行需索以致蘇後先情迫

投繯伯仁繇我而死嘉祿雖隊長三尺難辭一
遣同事張一縉承行孫光發分別徒杖以正厥
辜至於訓導楊于國委靡不振縱下生姦坐誤
軍糈褫逐允當再查江南各縣應給糧銀據常
鎮道回報查得常州府所屬五縣內除無錫宜
興二縣原未派有通州所糧銀外據靖江縣申
稱該所月糧銀三百八十七兩九錢二分五釐
于崇禎三年十二月十五日給發旗軍王愛等
支領訖又據江陰縣申報該所糧銀于崇禎三

年十二月二十八日先給銀一百兩崇禎四年
二月初四日找給銀二百三十七兩二錢俱完
訖又據武進縣申報通州所旗軍王愛等應領
月糧銀二百六兩四錢八分七釐先經徵完在
庫候給第緣該所旗軍未到隨經差人勒限守
催該所于本年四月二十日起縣當堂給領訖
及詢遲領情繇該軍執稱領文先往江靖二縣
領銀以致遲領各存有印信領狀等因轉報到
臣據此又據漕儲道回報據領幫指揮保王福

回稱江南各縣糧銀各軍文領于五月內止解
到江陰縣銀一百五十兩并三月內如皋縣解
到糧銀先後給散外餘銀各旗守支尚未解到
等因該臣查得各縣月糧據常鎮道報已全給
據漕儲道報尚未到幫南北途遙則知爲各旗
之領解遷延明矣然就常鎮道所報武進縣給
發于四月二十日此時船久過洪該縣遲誤自
見難以旗軍赴領未到爲藉口也查見任知縣
程九萬應罰俸三箇月以信漕法以儆將來伏

乞

勅下該部一併查議具覆施行等因九月十七日奉
聖旨邵嘉祿等刑部覆擬具奏楊于國程九萬吏戶
二部看議來說欽此又該戶科抄出巡漕御史王
邦柱題同前事本月十九日奉

聖旨該部覆議具奏欽此欽遵通抄到部送司卷查
先奉本部送戶科抄出總漕部院李待問題前
事奉

聖旨姦吏邵嘉祿等勒索貧弁致令殞命情罪深重

着嚴行究擬速奏楊于國署篆統惡從重議處武
進等縣糧銀給發有無違誤一併查報其議單原
載罰例該部酌定飭行欽此又該巡漕御史王邦
柱題前事奉

聖旨已有旨了該部知道欽此當卽呈堂咨行總漕
部院并都察院轉行巡漕御史查究去後及查
單例一款運軍行糧官軍一到卽與支給如徵
收不及將在庫別項銀兩借支補還俱以文書
到日爲始一月不給者掌印糧官各罰俸半

年二月不給者各罰俸一年三月不給者各降
二級半年之上不給者從重擬處等因通行遵
照在卷今總漕巡漕會題邵嘉祿等招繇并議
楊于國革任程九萬罰俸緣繇奉

旨下部除邵嘉祿等聽刑部覆擬楊于國已經吏部
題覆革職爲民外其程九萬罰俸一節相應議
奏案呈到部該臣等看得省直漕舟必藉旗軍
以駕運而衛所旗軍必資行糧以糊口均爲漕
事之喫緊議單開載炳如星日誰敢紊之今據

漕臣李待問疏開各縣月糧俱已全完惟武進縣給發于四月二十日及查該縣申稱糧銀預經徵貯在庫業已差人守催赴領緣旗軍先往江靖二縣領銀以致遲誤但知縣程九萬官有專責職難他諉以二月開幫之船而行糧至四月給發誠無辭於誤漕之咎但徵銀在庫而旗軍先往江靖後赴武進則行糧遲誤之罪又難專責于該縣也應照二月不給之例罰俸一年庶積玩知警而漕政有裨矣既經總漕巡漕會

題前來相應覆

請恭候

命下臣部行文各該衙門一體欽遵施行

崇禎四年十月二十八日具

題十一月初六日奉

聖旨運軍亟資行糧豈有反行遲領之理程九萬明
係延誤例罰未足示懲還着另議奏奪欽此

再覆崇禎四年漕運早完官員疏

題爲償運糧儲事雲南清吏司案呈十月初四日
奉本部送戶科抄出該本部題覆巡漕御史王
邦柱疏前事內稱總督漕運戶部右侍郎李待
問總督倉場尚書錢春當漕政積弛之日奏軍
儲永賴之勛洵稱勞苦而功高首宜加恩而晉
秩如總理河道工部尚書朱光祚空制江淮安
瀾不驚宜從優異用示寵榮督治通鎮兵部侍
郎范景文飭防儲糈加意河漕宜有恩賚以酬

偉伐如原任應天巡撫曹文衡江西巡撫魏照
乘浙江巡撫陸完學湖廣巡撫魏光緒山東巡
撫余大成問船問米催兌催行雖任有淺深而
辦壓並著如直隸江北巡按御史史堃巡鹽兼
監兌御史鄧啓隆蘇松巡按御史饒京江西巡
按御史葉成章浙江巡按御史李炳山東巡按
御史高捷河南巡按御史李日宣嚴剔夙弊力
振新猷雖地分南北而勵勦同功又如河南監
兌主事諸葛義浙江監兌主事路文範蘇松監

允主事傅啓光山東監允主事焦覲祖江西監
允主事吳澧湖廣監允主事陸卿正禁戢宿蠹
涉歷艱辛又如坐櫬廳署郎中事主事劉夢桂
務關主事許捷催儉主事程世培通惠河郎中
馮敬舒百端竭蹶一意奉公以上諸臣俱于漕
事著有成績均應紀錄優叙以旌勞動者也至
巡漕御史王邦柱振飭精明督率整肅奔馳于
風餐水宿之中經理于千倉萬箱之際俾數十
年久違之限一朝頓復其實心幹

國與總漕督倉協恭並營以共襄厥成所當照舊
漕臣襲一程例候京堂員缺推用者也緣繇十

月初二日奉

聖旨漕運蚤竣該部正當確稽各官勤勩實蹟覈議
奏聞以憑激勸何得混行鋪列獎譽過實這本內
各官有任久勞深及地方錢糧重大催解獨多的
着查酌議叙餘不必槩及還着另本分別來看欽
此欽遵抄出到部送司查得薦舉各官奉

旨查酌議叙相應分別具覆案呈到部該臣等看得

國家歲漕四百萬石徵派遍七省直爲數綦廣輓
輸經數千里爲力綦勞

祖宗朝正慮轉運艱難自水次以至津通繩之以限懲
之以法意蓋深遠矣沿習日久廢弛日甚一運
而兩載始完終歲而水陸交疲幸我

皇上毅然更新中外臣工凜承

明命拮据督催向來凍阻河干者今歲甫至八月而
已盡入倉庾將來歲歲之早實基於茲此百年
僅見之事真

皇上獨斷之功也查漕事旣竣司漕諸臣皆有屬揚
舊例茲當漕規新復之時尤與尋常不同頃按
漕臣王邦柱疏臣愚以爲鞠躬盡瘁政臣下致
身之誼而論功懋賞廼

主上磨勵之權是以覆議奏請今

皇上以獎譽過實仍

勅臣部查任久勞深地方錢糧重大催解獨多者分
別來看仰見

聖慮淵微賞必當功真若發臣等之覆矣臣等敢不

奉以遵行查得漕運重務提衡于江淮者總漕
部臣也督察於南北者巡漕按臣也輸紉于京
通倉者倉場督臣也此三臣者皆所稱同功一
體者也今查總督漕運戶部右侍郎李待問胸
有全漕目同懸鑑遂使帆檣競進飽騰攸資歷
運三年計期滿考厥績甚懋總督倉場戶部尚
書錢春殫心殫畫矢志忠勤頓今萬艘先登千
倉乃積經營二載銷筭三週厥勞甚深巡漕御
史王邦柱拮据獨苦寒暑不辭十二總官旗聞

風悚息四百萬漕艘刻限鱗集厥勤甚著去歲
漕事竣于孟冬今歲竣于仲秋比前更蚤兩月
在李待問錢春均應晉秩加恩用示激勸而王
邦柱則有舊漕臣龔一程題叙之例在焉臣等
不敢泯人之功而沒人之善也他如總理河道
工部尚書朱光祚飛輓頃刻無阻河漕原自相
關督理通鎮兵部侍郎范景文防範顆粒無虞
儲糈多所賴藉原任應天巡撫今陞薊遼總督
兵部右侍郎曹文衡江西巡撫右僉都御史魏

照乘浙江巡撫右副都御史陸完學湖廣巡撫
右副都御史魏光緒山東巡撫右副都御史余
大成撫綏留心民隱輓輸注念軍儲蘇松巡按
御史饒京江北巡按御史史堃巡鹽兼監兌御
史邵啓隆江西巡按御史葉成章浙江巡按御
史李柄山東巡按御史高捷河南巡按御史李
日宣大振繡帑威稜盡除餘觥積弊蘇松監兌
主事傅啓光浙江監兌主事路文範河南監兌
主事諸葛羲山東監兌主事焦觀祖江西監兌

主事吳澧湖廣監兌主事陸卿正兌運先期克竣啓行督押必親坐糧廳郎中劉夢桂河西務主事許捷催餉漕運主事程世培通惠河道郎中馮敬舒夙夜不辭竭蹶剝運立見飛馳以上諸臣同心體

國協力急公內查漕糧最多者無過應天撫臣曹文衡所轄七總其轉輸爲最煩又曹文衡與江西撫臣魏照乘俱管理三運其經營爲最久是又諸撫臣中前茅所當紀錄優叙者目今二臣

奏最司功是在

皇上自有鑑衡非臣等所敢擬議也其餘諸臣或歷俸有淺深或漕運非專責又有任僅一隅職專一事難與督撫諸臣較長挈大然均於漕事有勞卽撫按中抵任稍遲未與漕事者原未列名其間似應一併紀錄雖奉有不必要及之

旨但省直藩臬諸臣如陳應元等俱已先經臣部題覆奉

旨紀錄則撫按分司諸臣固不得別有異同也此後

漕規既復每歲另作題叙誠不得援今茲以爲
例矣伏祈

勅下吏部再加酌議分別加銜紀錄施行

崇禎四年十一月初四日具 題本月十六日奉

聖旨李待問督漕三運積有勤勞准與議叙錢春重
庾恪職着候新運完日通叙曹文衡已經陞任併
魏照乘俱着吏部酌奏王邦柱奉差勤勸着于應
陞時併論其餘各官都准紀錄示勸漕運早竣乃
各官職掌以後不得爲例該部院知道欽此

題車戶運糧請增一釐腳價疏

題爲懇恩照例准給腳價以蘇賠累以救貧役事
雲南清吏司案呈奉本部送大通橋員外郎李
士元呈據天字等十三號軍糧車戶崔全忠等
稟稱今歲漕糧運湧完蚤腳價高貴每石東倉
不下三十文西倉不下四十文腳價有額賠苦
無窮思得新增一釐已蒙前部堂批允糧完議
給懇乞申請給發以救貧命等情據此查得去
年一釐之增原係隨時增減但車戶而果無甚

賠累也何敢輕有所請以開恩於車戶惟是今
歲始則天旱糧稀車畜空養繼則天雨連綿車
價騰起兼以日行三萬在橋車少而進數多各
軍夫復勒要高價車戶實實有是賠墊之苦則
去年題復一釐之價職橋敢爲祈請者也呈乞
垂察運役苦楚將此新添一釐之價或題

請給與或徑行批發等因到部奉批今年大通橋共
領過腳價若干仍再查明銷算具題補給奉此
又奉本部送據大通橋員外郎李士元呈稱奉

本部批據車戶崔全忠等呈同前事緣繇奉批
大通橋監督司官查議報奉此查得車戶所告
之苦皆非虛捏職橋於屢次申請腳價中如天
旱糧稀車畜之空轆也糧湧價騰賠墊之難支
也亦曾爲之備悉其苦蓋不待車戶之控已蚤
爲言矣總之糧運零星車戶猶可勉支惟日行
三萬則雇覓之價倍于平常實爲難堪查舊案
有東西二倉各加增一釐之例奉

旨原係隨時酌給不得執爲定例在車戶欲望多于

一釐之外但當此庫藏空虛之時百務俱當節
節職橋何敢輕爲置喙惟是仰祈本部垂憐運
役或疏題明白將酌給一釐之價永遠著爲定
例至于再遇有天時旱潦不齊定又多如許之
賠墊或再臨時詳請量爲題加是格外之仁職
橋所不敢預爲輕請者也等因到部奉批一釐
舊例所有今日尚費推敲猶須具題可再求多
于一釐之外乎大屬癡想矣雲南司查議奉此
查得東倉實進米一百六十九萬四千七百五

十七石四斗八升每石該腳價銀二分一釐算
共該銀三萬五千五百八十九兩九錢七釐零
西倉實進米二十四萬九千六百八十九石四
斗五升每石該腳價銀二分七釐算共該銀六
千七百四十一兩六錢一分五釐零東西二倉
共該腳價銀四萬二千三百三十一兩五錢二
分零除八次給領過庫銀四萬兩外尚該找給
銀二千三百三十一兩五錢二分零此通查之
清數也至于東西二倉每石加增一釐共該銀

一千九百四十四兩四錢四分六釐零此又在
應找給二千三百三十一兩五錢之外也應否
准從相應具請酌奪案呈到部該臣等看得車
戶運糧腳價東倉每石二分一釐西倉每石二
分七釐此向來舊例也自天啓六七年間因工
作煩興車畜騰貴各役苦累不堪每石議增一
釐以卹其私二三年來各役照例支領業已視
爲定額近緣輕賚歸入太倉臣部仰遵節省
明旨新增一釐遂欲議減去年各役紛紛泣告臣部

酌議具題

請給業奉

明旨這所增脚價依議行以後還因時酌給不得執
爲定例欽此假令時果可已臣部何敢爲若輩爭
涓滴于

公帑但今歲運務始則天旱水涸糧艘不至旣而
一時畢集陰雨難行且奉日行三萬之

旨刻日轉輸車畜脚價一時騰湧誠有不減于往昔
也者今各役尚奢望于一釐之外豈能再減于

一釐之內則臣等不得不爲之誼益也合無仰
祈

聖慈俯憐貧役之苦照舊准給此後仍以年歲豐歉
晴雨爲加損斷不敢市恩樹德而輕費
朝廷之金錢也既經該橋具呈前來相應題

請恭候

命下臣部遵奉施行

崇禎四年十一月初十日具

題本月十三日奉

聖旨據奏今歲漕糧湧集車畜騰貴這所增腳價依
議給發前奉有因時的給之旨李士元如何呈請
著爲定例顯屬徇私市恩姑不究欽此

覆知縣程九萬降級管事疏

題爲特糾違玩有司以飭漕政事雲南清吏司案
呈十一月初九日奉本部送戶科抄出該本部
題覆總漕部院李待問題前事該臣等看得省
直漕舟必藉旗軍以駕運而衛所旗軍必資行
糧以糊口均爲漕事之喫緊議單開載炳如星
日誰敢紊之今據漕臣李待問疏開各縣月糧
俱已全完惟武進縣給發于四月二十日及查
該縣申稱糧銀預經徵貯在庫業已差人守催

赴領緣旗軍先往江靖二縣領銀以致遲誤但知縣程九萬官有專責職難他諉以二月開船之船而行糧至四月給發誠無辭于誤漕之咎但徵銀在庫而旗軍先往江靖後赴武進則行糧遲誤之罪又難專責於該縣也應照二月不給之例罰俸一年庶積玩知警而漕政有裨矣等因十一月初六日奉

聖旨運軍亟資行糧豈有反行遲領之理程九萬明係延誤例罰未足示懲還着另議奏奪欽此欽遵

抄出到部送司相應另議奏

奪案呈到部該臣等看得旗軍月糧與漕運同派原
無先後有延誤者照例罰治頃據漕撫督臣疏
叅武進知縣程九萬給發行糧于四月二十日
議應罰俸三月奉

旨下部臣等查議單開載凡運軍行糧遲一月不給
者掌印官罰俸半年二月不給者罰俸一年今
該縣給發于四月視二月開幫之限已違二月
臣等故照二月不給之例擬罰一年今

明旨以例罰未足示懲還着另議奏奪仰見

皇上當漕運挽遲爲速之日謂不重加繩治無以振
積玩而奏維新若發臣等之覆矣但查知縣程
九萬原以吏治有聲調煩巨邑又常屬班運軍
糧先該江南撫按具疏議割一半解京抵充班
軍折價該縣坐此致有遲廻非敢玩視漕政者
也臣部近于七月內業復題

請歸還江北協濟矣旣奉另議之

旨相應從重改擬降職一級照舊管事以示創懲仍

俟新運完日聽該撫按具奏

定奪庶

國法大彰而漕事亦有裨矣既經該司案呈前來
相應題

請恭候

命下臣部行文各該衙門欽遵施行

崇禎四年十一月二十七日具

題本月三十日奉

聖旨程九萬著降一級照舊管事俟新運完日奏奪

欽此

題覆六倉完糧腳價疏

題爲請發完糧腳價銀兩事雲南清吏司案呈十一月十七日奉本部送據京糧廳員外郎秦壘呈前事內稱准舊太倉等六倉造送腳價文冊開舊太西北二門倉實進漕斛米三十九萬九千八百六十一石九斗二升零該五項腳價銀七千五百一兩一錢三分零南新濟陽二倉實進漕斛米三十四萬二千九百六十七石九斗一升零該五項銀六千四百二十兩八錢零海

運新太二倉實進漕斛米四十六萬一百九十五石六斗零該五項銀八千六百六十三兩二錢八分零北新大軍二倉實進漕斛米二十八萬五千八百三十七石九斗六升零該五項銀五千三百三十五兩六錢七分零西新太平大興三倉實進漕斛米二十二萬三千九百三十三石六斗五升零該五項銀四千二百一十六兩七錢五分零祿米倉實進漕斛米八萬四千二百五十二石一斗五升零該五項銀二千五

百八十兩八錢九分零到職隨該本職逐倉逐
衛磨算明白彙冊呈送聽候批示支給等因到
部奉批各倉脚價舊有加一扣除之例今仍可
踵行否通計三萬三千七百餘兩今輕賁無幾
而待領甚衆卽先給三分之一亦當得銀一萬
一千餘兩雖傾儲以給而人尚有缺望也奈何
雲南司查議奉此查得舊太西北二門倉實進
米三十九萬九千八百六十一石九斗二升零
歇家包圍每石該銀八釐五毫共銀三千三百

九十八兩八錢二分零小脚抗糧創國每石該
銀四釐共銀一千五百九十九兩四錢四分零
舖軍抱籌糧斛打捲每石該銀七毫共銀二百
七十九兩九錢零曬夫飯米每船該銀一兩一
錢除扣外共銀九百七十八兩五錢五分零旗
軍房水每船該銀一兩二錢共銀一千二百四
十四兩四錢南新濟陽二倉實進米三十四萬
二千九百六十七石九斗一升零歇家包國每
石八釐五毫共銀二千九百一十五兩二錢二

分零小脚抗糧倒囤每石四釐共銀一千三百
七十一兩八錢七分舖軍抱籌擡斛打捲每石
七毫共銀二百四十兩七分零曬天飯米每船
一兩一錢除扣外共銀八百三十三兩四錢二
分零旗軍房水每船一兩二錢共銀一千六十
兩二錢海運新太二倉實進米四十六萬一百
九十五石六斗零歇家包囤每石八釐五毫共
銀三千九百一十一兩六錢六分零小脚抗糧
倒囤每石四釐共銀一千八百四十兩七錢八

分零鋪軍抱籌糧斛打捲每石七毫共銀三
二十一兩九錢三分零曉夫飯米每船一兩一
錢除扣外共銀一千一百五十九兩一錢零旗
軍房水每船一兩二錢共銀一千四百二十九
兩八錢北新大軍二倉實進米二十八萬五千
八百三十七石九斗六升零歇家包圍每石八
釐五毫共銀二千四百二十九兩六錢二分小
脚抗糧倒圍每石四釐共銀一千一百四十二
兩三錢四分零鋪軍抱籌糧斛打捲每石七毫

共銀二百兩八分零曬夫飯米每船一兩一錢
除扣外共銀六百九十四兩八錢九分零旗軍
房水每船一兩二錢共銀八百六十七兩七錢
二分西新太平大興三倉實進米二十二萬三
千九百三十六石六斗五升零歇家包圍每石
八釐五毫共銀一千九百三兩四錢六分零小
脚抗糧倒囤每石四釐共銀八百九十五兩七
錢四分零舖軍抱籌擡斛打捲每石七毫共銀
一百五十六兩七錢五分零曬夫飯米每船一

兩一錢除扣外共銀五百六十二兩七錢五分
零旗軍房水每船一兩二錢共銀九十八兩四
分祿米倉實進米八萬四千二百五十二石一
斗五升零歇家包圍每石八釐五毫共銀七百
一十六兩一錢四分小脚抗糧倒圍每石四釐
共銀三百三十七兩零舖軍抱簍糧斛打捲每
石七毫共銀五十八兩九錢七分曬夫飯米每
船一兩一錢除扣外共銀二百八兩三錢七分
零旗軍房水每船一兩二錢共銀九十八兩四

四錢六倉通共該銀三萬三千七百一十八兩五錢零冊報在案爲照各倉五項銀兩原係額定輕賣備各役完糧腳價之需似無可增減者但年來帑藏匱絀軍興煩費每事遵

旨節省所以有加一扣除之例已經遵行今年通邊等倉俱要做而行之以佐空乏京倉自無全給之理今據京糧廳員外郎秦垌呈稱六倉共該腳價銀三萬三千七百一十八兩五錢零而通津邊倉不與焉貪役固宜軫恤

國帑亦當節儉合無除扣加一外先給三分之一
餘俟來春二月再給一分夏初完給可也等因
呈堂奉批如議速行具題以便給發奉此案呈
到部該臣等看得漕米入倉五項銀兩皆額定
之則例也故每歲運竣銷筭明白卽於輕賁銀
內動給倉役以爲脚價之需今在京六倉共該
五項銀三萬三千七百一十八兩零往例委應
照數准給第值三空四盡之時奉有節省贏餘
之

旨似又不得拘于例而漫無裁抑者去歲據前任京糧廳郎中寶星之議凡京倉腳價俱給十分之九以恤各役之勤劬仍扣十分之一以佐

公家之匱絀雖涓滴無裨亦河海不擇細流之意業已准行今歲通邊各倉亦當一例永著爲令其京倉本年應領銀兩除扣省外尚該三萬三百餘金輕賫庫貯無幾豈能傾儲以應合無俯如該司議先給三分之一餘俟來歲仲春初夏兩次找足接濟新運至通邊各倉候其清冊到

日臣部照京倉例一體扣給蓋亦節省之計可
以稍裕

國儲者也既經該司案呈前來相應具題恭候
命下臣部通行各該衙門遵照施行

崇禎四年十一月二十八日具

題閏十一月初二日奉

聖旨是欽此

酌議漕糧銷筭抵欠規則疏

題爲酌議漕糧銷筭抵欠規則以便遵守事雲南
清吏司案呈崇禎四年八月十三日奉本部送
戶科抄出總督倉場尚書錢春題爲稽查運官
完欠以昭勸懲事截叅崇禎三年領運二年漕
糧各弁完欠緣繇內稱截叅遲之弊大速之利
多臣于六月間覆本部議截叅一款以爲截叅
宜速向欲議及之蓋過壩爲大畧之數收厰爲
的實之數近來業已行令進米報回袋報晒揚

入厥截收既有印冊可查刻期復有紅單可核
母容以脚價藉口迂遲就以各倉報完之日爲
截撥之日可也蓋米旣入厥何嘗見有擔米入
倉者銀不出給又何嘗見有齎銀入庫者卽有
之亦百中之一二也而抵銷借銷不過一盤虛

帳虧

國帑而損軍儲莫此爲甚私心竊痛恨之嗣後京
通兩廳容責取各倉實收數目乘官旗廳集之
時卽行具題以別自運弁之功罪萬一謂不可

絕其自新之路續納之門與對兌之法則將題
過各官旗令兩廳照完數查算逐名逐項開結
某某該給銀若干詳細造冊二本又將各官旗
實欠米數亦逐名逐項詳細造冊二本呈本部
行雲南司覆覈無異一存案一送總督比較以
本部題覆或送法司或送漕司之日爲止有米
入倉則總督照續納倉收一一親爲註銷有銀
可抵則行太倉庫將前項應領銀兌出另貯一
處出給詳明庫收付照以憑將二冊查對批銷

另行彙題下部存案如是則米無偽粒銀非虛
錙猶勝於但以烏有無是公徒費腕力精神而
輕齋一項亦庶乎支銷明白盤踞諸奸亦不得
以遲速高下此摭彼搜忽無條有行其網羅矣
此臣管蠡之見自謂可以絕因循而破猶豫其
於運事未必無補也等因八月初八日奉

聖旨這罰俸降級問罪監追及免議各員着該部覆
加查覈分別款項數目開寫明白來行不許連篇
混列致難覽詳截叅一法原欲儆玩清逋若延擱

假借日久游移何裨懲勸這所奏該部一併酌議
具覆卿督儲精覈具徵任事知道了該衙門知道
欽此欽遵抄出到部送司查得三年領運各弁
完欠細數見在勒限銷算明白另行具覆至於
督部所議截叅之法并銷算規則相應具題遵
守案呈到部該臣等看得

國家歲漕四百萬石以餉京邊其在水次交兌正
糧之外又有耗米潤米額數原是有餘而奸婪
官旗逆料庫中有應領銀兩先從水次折乾加

以沿途盜賣及至截叅銷算多將應領庫銀呈
請扣抵又或此幫借抵彼幫彼總復借此總甚
至以一衛之餘銀而兩衛分借以遠年之簠羹
而先後混掣易滋弊竇但此項銀兩原係各弁
應得之物若不准其銷簠則當照例給與是倉
米未補而庫銀已出矣則抵銷借銷是亦無可
柰何之計誠有不得不然者但稽核不精必多
冒濫今督臣錢春議令京通二廳先將各衛所
官旗逐一銷算其完其欠并實欠米數備造文

冊再將應領完糧等銀逐項查算某官應給基
項銀若干亦備造文冊一呈臣部查核一送督
臣比較嗣後有米入倉有銀可扣取有倉收庫
收俱聽督臣查對批銷彙題存案其銀另項收
貯以備支放米折之用則入倉顆粒與扣庫釐
毫無可施其混冒真足清弊源而裕

國儲矣惟是銷算頭緒最爲紛紜銷算規則當著
爲令向來通廳及該司猾胥受賄舞文或多高
下其手臣等查核議單斟酌舊例謹開列欵目

恭塵

睿覽以便臣部與督臣共爲遵行再照今歲運事較往歲獨早各弁完者欠者業已了然其中應抵應追尤宜早結但銷算截叅向係督臣職掌臣部止於綜理大槩以覆疏爲職而已近因輕齎改貯太倉應領應銷臣部不得不倍爲慎重然照管所不及思慮所不到常懼有混淆之虞督臣洞徹弊源更新漕政凡一切運弁應抵應借及應給之數無能出其坐照此後當勒令京通

二廳磨勘明確通詳臣部督部槩爲批示方准作數務在銷算的實不在截叅早晚此又歷來通行之例不妨再一申飭不然在臣部爲侵官在督臣爲失職無一可者也謹因條議銷算之規則而并及之旣經督臣具題前來相應覆

請恭候

命下臣部移文各該衙門一體欽遵施行

計開

完糧應准抵銷者七項

一羨餘銀係優卹旗軍回空之費山東

遮洋二總每船例給一兩

中都淮大上江下江揚州錦衣旗手七總每船例

給二兩湖廣江西浙東浙西四總每

船例給四兩糧完詳准查給有掛欠

數多者照例減除其應領者例得扣

抵

一葦把銀係倉中鋪墊之需每船每年

例給銀二錢糧完運官親領遇有掛

欠減除明白例得扣抵

一掀掃色斗銀係交糧揚晒之需每船
例給銀三錢輪年本折本色年分運
官親領遇有掛欠減除明白例得扣
抵

一紙劄銀係運官交糧投文造冊之費
每幫給銀二兩糧完運官親領遇有
掛欠例得扣抵

一簞夫銀係沿途添簞雇夫之費

中都淮大上江下江揚州錦衣旗手湖廣江西浙
東浙西十一總每石有隨糧銀一分
每年聽漕院題

准照例給發遇有掛欠減除明白准其扣抵遼糧例
折大斛隨正糧給發有上中下三等
一分八釐六釐之別此舊例也今宜
折中議定不分上中下等第每石俱
准八釐以杜游移高下之弊亦惟扣
抵掛欠

一小封銀係運官墊給河剝船戶之費
每河西務告請剝船一隻運官先自
墊給船戶銀八錢以爲盤剝落崖之
費通廳查照務關印信簡明手本如
數呈部給還運官糧完運官親領遇
有掛欠例應扣抵但務關向無文冊
報部亦是缺陷仍令每歲造報以便
抽對稽查

一交瓶銀係帶運光祿寺酒瓶腳價每

船順帶酒瓶三十八個每個該腳價
銀一釐五毫又有運磚腳價自臨清
帶至通州多少不等每城磚一個該
腳價銀一分仍磚一個該腳價銀五
釐今查三年並無帶磚如四年有運
磚者應照舊例給發以上二項糧完
准給但交瓶在光祿交磚在工部恐
有短少混冒之弊今後納完瓶磚部
寺具冊移會以便銷算通廳則以實

收爲據庶無混淆遇有掛欠准其扣抵

應扣省不全給者一項

一遼糧脚價原係運官墊給倉中交糧之費每大斛米一石給歇家包圍銀八釐五毫小脚抗糧倒回銀四釐雇人抱籌擡斛打捲銀七毫後又取償於官此例不知起於何時不載議單亦未具題似屬相沿陋規但京通二

倉原未領此腳價先墊後給亦小封
遺意也然查京通邊各倉完糧銀兩
皆加一扣除此項腳價豈容取盈每
石准給一分足矣以後倉歇亦不得
多索遇有掛欠例得扣抵

裁革不應抵銷者一項

一盤纏銀兩查議單舊例給把總銀一
十兩指揮十兩千戶衛鎮撫六兩百
戶所鎮撫四兩完糧三日之內過淮

依期與不過淮者全給完糧三月之外過淮依期與不過淮者給一半完糧三月之外過淮後期者給三分之一完糧依期過淮後期給一半完糧過淮依期官被論者及過淮依期完糧在五月外者俱盡行停給其應給者遇有掛欠准其扣抵蓋嘉予依期完糧之意也今查衛所各弁領運完糧乃其職掌彼有此無易起混淆今

議前項盤費以後槩行免給永著爲

令

截叅後錢糧不應借銷者一項

一借抵錢糧宜防重冒查運官完糧銀兩例應准給若崇禎元二年者截叅已久豈有未經銷算之銀如各弁以元二年舊銀求抵三四年新欠者卽係混冒不准作數若以三四兩年銀兩扣抵從前掛欠者乃係新糧已完

而補舊欠應聽其便以後但經截參
年分悉禁借銷俱照此例又有一宗
完糧之銀隔總隔年彼此分借轉換
分析最易重冒今後完糧運官經通
廳銷算明白者查其在庫應給銀兩
若干請詳臣部督部批准在案通廳
先給執照本官不及候領卽以執照
付給買借之官如呈請借銷日卽以
執照爲憑間有借銷而銀仍有餘又

許賣與別衛再具手本某官借到某
衛某官銀若干除抵過外尚剩銀若
干再批給執照其原批執照塗抹附
卷嗣有借者又以後給執照爲準庶
重冒之弊可杜而完糧者亦免守候
之苦矣

省直應起解抵銷者一項

一防欠月糧宜責成糧道解通查軍旗
行月糧銀外又有防欠三個月月糧

舊例省直糧道委官解通其旗甲之
完糧者給之欠者扣之立法固甚善
也近多解交通州該州遇有緊急輒
爲那借而十三總屬藉口不解矣兩
浙間有解者運官與解官又通同隱
匿至于運官把總以公費爲題目瓜
分肥橐旗甲之驚狡者猶得十之一
二新僉弱旗絕不敢問一遇掛欠勞
獎貧旗苦無可抵則有相率以逃耳

今後宜責成省直糧道凡新運開行
卽委的當官員解寄通濟庫內取回
文赴道繳查至漕米抵通旗甲無欠
卽唱名給散有欠卽銷算扣抵具詳
申報其扣存銀兩年終彙解太倉此
不勞追比而逸於得銀其于倉庫之
誦未必無小補矣

崇禎四年閏十一月二十四日具

題本月二十六日奉

聖旨銷算既屬督部職掌這規則還與面商詳確其
京通兩廳通詳批示依議行欽此